

faiz l'année qu'il vint à sa couronne en ses pays de Champagne et Bourgogne et autrement selon que arbitres doyvent congnoistre tant d'un cousté que d'autre, ainsi que plus amplement est contenu en leurs dictes instructions.

Touteffoys, pour ce que les dessusdicts Guyot et Grob, depuis qu'ilz sont arrivés par delà ont escript et adverty ledict seigneur que certain évesque de Volines et autres en sa compagnie de la part du Roy des Roumains doyvent de bref venir vers lesdictes Lignes tant pour conforter lesdicts querelleurs et les irriter et mouvoyr plus fort à l'encontre du Roy que pour tenir et machiner autres praticques audict pays au domaige et préjudice dudict seigneur, si possible leur est, ce qui pourroit porter inconvéniens si aucun bon personnaige de bonne expérience n'y étoit pour y résister, à ceste cause ledict Messire Hymbert, à la meilleure diligence que possible luy sera, s'en tirera audict pays et jusques au lieu de ladicte journée et plus avant, si besoing est, en passant par Genève et par Fribourg ouquel lieu il trouvera messire Petreman de Foussigny, advoué dudict Fribourg et le secrétaire de la ville qui ont accoustumé adresser les gens et affaires du Roy par delà, par lesquels il pourra entendre et savoir des choses dessusdictes et avoir des nouvelles desdicts Guyot et Petter Grob, et selon qu'il verra estre besoing pour pourveoir aux inconvéniens dessusdicts posé oresque les dessusdicts feussent jà de retour audict Fribourg ou plus en çà, tirera plus avant dedans ledict pays des Lignes où il verra estre plus nécessaire pour résister aux praticques dudict Roy des Roumains, en quoy faisant pourra joindre avec luy le dessusdict Petter Grob pour estre son truchement et luy tenir compaignie, aussy luy faire congnoistre les bons amis et serviteurs du Roy pour s'en ayder ès choses dessusdictes, et ledict Guyot s'en pourra revenyr.

Avant partir dudict Fribourg, selon l'advis dudict messire Petreman et secrétaire, prendra sauf conduyt de ceulx de Berne et delà en avant, ainsi que sera besoing, à Lucerne trouvera Nicolas Affort, aussy serviteur du Roy, à Surich